



Орган Лемковского Союза

Выходит в каждый четверг.

Редакция и администрация в Крынци. — Адрес „Лемко“ Крыница.

Пренумерата в краю:
 30 грошей місячно,
 80 „ квартално,
 1.50 „ полрочно,
 3 зл. рочно.

В Америкі: 1 дол. рочно.
 В Чехословакии:
 2 кор. місячно, 10 кор. полрочно,
 20 кор. рочно.

Ціны оголошень:
 Ціла сторона 120 зл., 1/2 сторони 60 зл., 1/4 сторони 35 зл., 1/8 стор. 20 зл., 1/16 стор. 10 зл.; оголошення малы за 1 мм. 20 гр., в тексті 30 гр., перед текстом 40 гр. При місячном и долгом оголошеню значна знижка.

Кonto чекове Нр. 404.155.

Новый процес в Совітах.

Парыска газета „Журнал“ подае, же в Москві отбуде ся в найблизшом часі новый процес. Яко обвинены засядут: маршал совітской арміи Егоров, адмирал Викторов, начальник военной авіації Алксис, начальник Білорусского военного округа Горбачев и коменданты войск Дыбенко и Каширин.

Таким способом Сталин позбуде ся праві всіх заслуженых и знаючих добре свое діло начальников военных. Войско остае без опытных и способных полководцев. Першим, затравленным через Сталина, был маршал Тухачевский, котрого в Европі назвали совітским Наполеоном, за ним идут други. На их місце назначат ся людей, котры не маюют военного знания, але сут зато попераны через Г. П. У. Таким являт ся украинец Федько, котрого Сталин назначил на місце Тухачевского и котрый знаний ест со звірства в часі перевороту в Совітах. Другий теп. начальник войск, то журналист Мехлис, котрый зро-

бил военну карьеру в Чека, инший Шаденко, котрый также стоит тепер во верхах военной власти, был передом кравцом. Так то Совіты стали тепер страном всяких возможностей. Люде, котры уміют шити ногавки, попадаюют в полководцы, а славны полководцы и организаторы арміи, сидат по вязницах и им грозит смерть лем за того, же не годят ся с политыком кырвавого Сталина.

Войсковых, котрых маюют тепер судити, выдал в послідном процесі Рыков. Другый засуджений в том процесі, а именно Раковский, выдал знова совітских дыпльоматов: Юренева, Богомолова, Якубовича, Розенберга, Давтяна, Аросева, Лемуса, Подольского, Карского и Островского. Всі они маюют быти суджены в коротком часі.

Кромі тых видных войсковых начальников на лаві обвиненых мае засісти велике число низших офицеров совітской арміи.

Погодили ся с фактом.

Прилучене Австрии до Німеччины наробило в перших днях много шуму в Европі. Запротестовали против тому Англия и Франция, але видячи, же Гитлер не робит собі нич с того, погодили ся с фактом и переслали ноты до Берлина, в котрых заявили, же признаюют прилучене Австрии до Німеччины.

Протест польского посла в Празі.

Посол польской в Чехословакии выразил протест против анты-польской діяльности чешской комунистычной партии. Ческе правительство переводит тепер слідство в той справі и по выясненю информации, помещеных в ноті, мае дати отвіт.

Политычны чешкы кругы твердят, што ческе правительство выполняло уж нераз основане жаданя своих сусідов. Меже иншим, усунуло оно с терену Чехословакии штаб украинской национальной партии и выселило ей начальника Коновальца.

Конец испанской войны.

Послідны дни принесли арміи генерала Франко ряд рішительных побід, в виду чого належит надіяти ся скорого конца домашней войны в Испании.

Ведля послідных вистей войска националистов заняли уж Тортозу и тым самым перерізали комуникацію меже Валенциом и Барцельоном и оперли ся о Середземне Море. Таким способом отрізали они полудневу Испанию от Каталонии.

В политычных и войсковых кругах французских осуждаюют тот факт яко ликвидацию домашней войны в Испании и рішительну побіду войск генерала Франко.

Францускы газеты подаюют дальше, же число утікаючих с Испании людей росне с каждым днем и же треба ся числити с тым, же в разі занятя Барцельоны через повстанчи войска, осягне понад 100 тысяч людей, котры заліюют пограничны терены в Пиренеях.

Комунисты в Подкарпатской Руси.

С Ужгорода доносят, што комунисты оживили свою діяльність в Подкарпатской Руси, особенно в полночной части краю, на границі чешко - польской. Потверджат тото комунистычна газета „Руде Право“, котра подае, же в том районі отбыло ся парудесят комунистычных собрань.

Бесідуючи на тых собранях комунисты

заявили, же члены комунистычной партии готовы боронити чешку державу, але мусят быти усунены с ней всі реакційны элементы, котры перешкаджаюют сотрудицтву с Совітами и высказуюют ся за згодом с Німеччином.

„Руде Право“ подае, же тепер оживил ся рух комунистычной Партии в Подкарпатской Руси.

Судеты творят свое власне правительство?

Тяжке положене Чехословакии.

Англицкы газеты занимаюют ся дальше политычным положением Чехословакии, котре представляюют в чорных барвах.

Социялистычна газета „Дайли Геральд“ подае, же положене, если ходит о меньшинства в Чехословакии, ест катастрофальне и значно планьше, як то собі представлят чешке правительство. Ведля той газеты ніт обавы якоїси войны, але по просту правительство центральне втратит терытории, населены німцами так, як то своего часу втратила Англия свою власть над Ирландиом.

Уж тепер положене ест того рода, же немного бракуе, штобы в Судетах повстало ровнорядне правительство льокальне. Коли ся тото стане, правительство в Празі найде ся в трудном положеню, бо треба буде або погодити ся с фактом, або силом старати ся примусити судетских німцов до респектованя центрального правительства. В том однак другом случаю Прага мусит ся числити с интервенциом Німеччины.

Папанин оскаржат проф. Шмидта.

В Совітах иде тепер шалена нагонка на знаного в цілом научном світі проф. Шмидта. Професор Шмидт вславил ся своима выправами на полярний бігун и поробленима там науковима дослідами. Тепер выступил против нему Папанин, котрый обвинят проф. Шмидта, же он хотіл знищити бодайже не половину совітской фльоты, яка находила ся на Ледовом Океані.

Правительственны круги твердят, же до теперешный „герой совітский“, через свою шкодливу для Совітов діяльність, спричинил, же кораблям „Малыгин“, „Седов“ и „Садко“ разом с находячима ся на них людьми в числі около 200 грозит велика опасность.

Дальше зашмаряют Шмидтови, же допустил ся того, што найбільший совітский ледокол „Ермарк“ представлят тепер одну безхосенну купу на нич непридатного желіза,

вымагаючого што пару дней грунтового ремонту.

Крѣмі того обвиняют проф. Шмидта в том, же он зле сорганизовал выправу Папанина на полярный бігун, же не заосмотріл ю во всі потребны предметы и же дал папанинцам попсуты провианты.

Наконец папанинцы обвиняют проф. Шмидта в том, же он в часі остановки „Ермарка“ в Талині бесідовал с якимаси людьми, котры были напевно „троцкистами“.

Уж той сім закыд выстарчит в Совітах, штобы утратити свободу, а може и жуте, а штож доперва, як обвинят ся когоси, же он знищил таку масу кораблей. А на правду то там так было. Шмидт выслал на воды Ледового Океана кораблі „Малыгин“, „Седов“ и „Садко“ штобы они ратовали Папанина и его товаришей, котрым грозила опасность и кораблі тоты от великих морозов были скованы ледами и не могут ся рушити.

Што робити в пасіці на весну.

Продолжене.

Гнізда пчол треба поменьшати и старати ся о того, штобы они были теплы. Як же робит ся того?

С гнізд треба усунути всі рамки, котрых пчолы не обсадают, бо они сут непотребны. Выймує ся передовсем рамки тоты, котры мають стары плястры, або плястри трутovy. При выниманю рамок треба уважати, штобы тых рамок, в котрых ест припас незапліснійой перхы, невынимати, бо пчолы не все на весну могут назберати ей в достаточном количестві, а всякы заступчи средства сут нич варты.

Стары рамки, в котрых ест мед, оставляме на пару дней на краю уля при дощечці, але передом зрізуєме с очок заклеплене. Пчолы втотчас перенесут мед до гнізда. Зробити то то можна однак лем втотчас, як ест на дворі тепло.

По поменьшаню гнізда и его очищению належит его тепло отулити. Добра, груба мата при дверчиках, фалаток сукна и на нем добре допасована мата горішна, обезпечат улий належито. Вмісто сукна под горішну мату можна дати стары газеты, котры сполнят тоту саму ціль. Вчас на весну треба также поменьшати вылеты, штобы не доходило до середины уля за дуже зимного повітря.

По выполнению тых работ треба приготовить новы улии, надставки, рамки, штобы мати их готовы в разі потреби в сезоні літном.

По яких двох тыжднях належит посмотреть до улиев, бо може треба додати рамок. таким способом росширят ся постепенно гніздо и провадит нормальный розвой родини.

При весняных работах в пасіці треба звернути увагу на рабунки, котры приносят пасікам великы шкоды. Пчолы отвыкают от работы, летят на рабунок и утрудняют нормальну роботу в пасіці, а кромі того часто розносят по улях хвороту.

В пасіці повинно ся робити скоро й спокійно, притом не треба занадто гребети в гніздах, бо то то перешкаджат пчолам в работі, а также стає ся причином рабунку, бо другы пчолы, приманены запахом меду, надлітают и достають ся до гнізда.

За всяку ціну належит не допустити до рабунков. Если в часі работы в пасіці повстає рух, што ест доказом рабунку, треба перервати роботу в улию, закрити дверчики и по-

меньшати вылет во всіх улях, оставляючи лем місце на одну пчолу. Дашкы и дверчики мусят быти добре допасованы штобы не было шпар, котрыма рабусі могли бы ся доста-ти до середины уля.

Порожны улии треба позатыкати и с пасікы усунути. Рамки и вощину держати в коморах, до котрых пчолы ся не достають. Не відкрити рамок и не подкормляти пчол на дворі, што однак часто робят пасічники в літі, оставляючи вывированы рамки на дворі пчолам до осушения. Втотчас злітают ся пчолы с ріжных улиев, а може и с чужих пасік и заражают ся они ріжними хворотами.

Якы зела повинно ся мати в хаті.

Тепер, коли будит ся ціла природа до нового житя и коли наши поля покрывают ся прекрасными дыванами квітя и ріжных зел, хочеме звернути увагу наших почтенных читателей на гдеякы с них, котры курацийными свойствами представляют велику, однак на селі невыкористану, вартость.

Часто трафят ся меже людьми, же ктоси ннбыто не ест хворый, але чує ся несвой — тратит смак до їдла и силу до работы, ест все спячий и не суцый до ниякой работы. Часто также болит когоси голова, ломят кости або докучат жолудок и т. инше. В таких разях не все заходит потреба кликати лікара, але часто выстарчит знати гдеякы зела и пити вывар тых зел, штобы повернути до полного здравя.

Зела тоты, котры повинни быти высушені в каждой хаті, можна собі самому в літі назберати и высушити. При назбераню и высушению зел в великих розмірах, можна тоты зела также добре продати в аптеках и мати цілком добры доходы с той до тепер мало выкористаной галузи сельского господарства.

Тому редакция буде подавати в каждом числі спис зел, помагаючих на оден недуг, поясняячи одночасно, коли и што належит зберати и як сушити зела, штобы не утратили они курацийных свойств.

В теперешном номері подами зела, якы помагают при дыхавици (астмі). Сут то:

Ягоды яловца, листе лопушка, корень татарак, ціле зело петрушкы, насіне колендры.

Найлучше робити мішанину тых всіх зел по равной части, причом ягоды яловця належит потолчи. Заливати горячом водом, а коли на-тягне пити денно по 4 горнятка.

Яловец росне у нас по горбках и прилісках. Ягоды зберат ся, коли сут уж чорны, найлучше в другом році по приморозках, так, же стелит ся под кряком плахту и кьем обиват ся ягоды. Сушит ся ягоды на стрыху. Коли высохнут, выбрати занечищення и незрілы ягоды.

Діляне: вырабат смак до їдла, чистит кров, помагают при болях печенкы, дыхавици и злой переміні материи. Ціна за 1 кг. от 2—3 злотых.

Лопушок росне у нас на межах и горбках. Познати его можна легко по великих сподом білых, зверху зеленых гладких листках.

С лопушка зберат ся листкы и сушит в продувном, затіненом місци, розкладаючи их на полотні, або на папері.

Діляне: побуджат тоты и причинят ся до того, же флегма отходит. Помагают при простудах, кашлі и дыхавици. Сок с вытисненых свіжих листков, змішаний со свіжим молоком и медом, питый рано перед їдлом помагают знаменито при тяжкой астмі (дыхавици) и кашлі: Запарены листкы дають чай, помагающий также на отдыховы дорогы.

1 кг. лопушковых листков платит ся от 3—4 зл.

Татарак росне при берегах ставов, мочар и стоячих рік. Курацийны свойства має корень татараку, котрый належит выдобывати вчас на весну перед выпущенем листя. По выдобытю кореня с болота, треба его обмыти, соскребтати с него верхню, темну лупку, покряяти на малы кусники и сушити в продувном сухом місци. По точном высушению укладат ся его в шкляных баньках и ставят в сухом місци.

Діляне: помагают при бігунках, хвороті жолчи и почок, фебрі, шкрофулах и водной пухлині. Заживат ся его стертый на порошок (6 грамов денно) або яко вывар с кореня. Входит также яко складник до мішанкы зел на дыхавиця.

Ціна: 1 кг. высушеного кореня 5—9 злотых.

Продовжене в слідующем числі.

Отто Габсбург втратил маеток. Сын цисара Австрии Кароля, Отто Габсбург уважал себе за претендента до цисарского трону Австрии и Венгрии. Его мати цисарева Зита, по смерти мужа остала с 8-дітьми и мусіла жити барз скромно. Помимо того не позбыла ся она николи той мысли, же ей сын Отто, числячий тепер 26-рок житя, засяде колиси на троні Габсбургов и дала ему старанне выховане. Отто владіє плавно німецьким, французским, италиянским, испанским, англицьким и венгерским языком и знає праві цілу Европу.

„Аншлюсс“ Австрии до Німеччины перечеркнул его пляны осягнути австрийский трон, а понадто маеток Габсбургов, находячий ся в Австрии, якый перед двома роками отдало Габсбургам правительство Шушнига, отобрали им гутлеровскы ряды, так, же Отто втратил не лем трон, але и маеток.

Также его стараня о венгерский престол стали ся нереальны. Але за того може удаст ся ему засісти на троні испанском. Там, по побіді националистов, правдоподобно захотят мати короля и уж минулого року на короля пропоновано Ксаверого де Бурбон, брата цисаревой Зиты, а уйка Оттона. Тот не хоче обняти сам трону, лем дати на свое місце сестринка. Таким способом Отто Габсбург осіл бы на троні испанском.

Господарча нарада в Новом Санчі.

Дня 24. марта т. р., користаючи со случайности люстрации Староства через Г-на Краковского Воеводу, скликал Г-н Староста господарчу конференцию, яка отбыла ся в помещеню магистрату.

В конференции приняло участь понад 70-ох представителей всіх галузей господарчого жита повіта.

На конференции населене повіта новосандецкого высунуло слідуячи постуляти:

1) перенаселене повіта.

Признано же повіт ест перенаселеный, а доказом того ест факт, же около 50 процент сельских господарств ест карликовых, котры нияком міром не могут выкормити численных родин (сут то господарства понесше 2 га горского, планного грунту о родинах от 8—10 люда). Таке положене каже призадумати ся над том пекучом справом и глядати роботы для сельских безработных. Ту мусит ся звернути увагу на поселенчу акцию, безпроцентны кредиты на инвестыции, поддержку садоводства, оживлене руху літно - турыстычного и домашного промыслу а также на розбудову по містах торговлі и промыслу, штобы міста могли принимати сельских безработных.

Другым постулятом, який высунено, ест потреба

регуляции рік и потоков

и зроблене греблі по обох боках Дунайця.

3) Дорогы.

Дальше порушено справы дороговы и высказано ся за конечном потребом доконченя дорогы, ведучой вздовж рікы Попрад, и належитой консервации доіздовых дорог до Крыницы, а также признано потребу будовы дорогы: Фльорынка — Білцарева — Богуша — Завада — Новый Санч и дорогы: Пивнична — Щавница. Дорогы тоты мают велике господарче значене и причинят ся до оживленя руху літно - турыстычного.

4) Кредыты и штучны навозы.

На конференции порушено также справу продажи дерева в державных лісах, а также домагано ся увеличеня кредитов на родинны сплаты, бо признаный до тепер кредит оказал ся невыстарчающий. Жадано также пониженя ціны навозов штучных и перевозовой тарыфы.

Кромі тых головных болячок населеня пов. новосандецкого обговорено также справу выхову овец, котрых число поднесло ся двократно, але дальший розвой той галузи сельского господарства натрафят на основну перешкоду, а именно на недостаток пасовиск в літі. Хлоп вызимовал бы больше овец, але в літі не мае их где пасти.

Много увагы посвячено справам школьным и будові народных школ. На терені новонасдецкого повіта находит ся тепер в будові 28 школ и на их докончене потреба около 250 тысяч злотых, а на тоту ціль повіт мае всего лем около 100 тысяч.

Порушено также справу основаня отділа Касы безпроцентной, котра принесе населеню повіта великы користи.

На всі порушены справы дал Г-н Воевода вычерпующий отвіт:

На вступі своей річевой бесіды, заявил Г-н Воевода, же державны власти здают собі точно справу со всіх потреб и болячок населеня и старают ся всіма, стоячими до их распорядимости средствами, заспокоити правдивы его потребности.

На жаль, не даст ся всего нараз зробити и прото мусит ся быти в своих жаданях повздержным. Темпо помочи державной для господарчого жита населеня росне стало и теперешный, хоц тяжкый час, може сміло конкурвати в той области с літами наилучшой конюнктуры господарчой. Достаточно навести примір комасации грунтов, котра в том році обнимат пространство 3 раз больше, як то было передом. В самом краковском воеводстві комасуе ся тепер 15.000 гектаров, а перед 2-ма роками до комасации перенесено лем 5000 га.

Если расходит ся о дорогы, то новосандецкий повіт достае на тоту ціль значно больше, як инши повіты краковского воеводства. С загальной сумы, 15 миллионов злотых достал пов. новосандецк. 1,300.000 зл на будову новых дорог, не вчисляючи сум, переназначеных на консервацию.

В справі регуляции рік — переводит ся тепер роботы пляново. Не бере ся малых партий и не регулюе частей потоков чи рік, бо таку роботу нищит звычайно перша злива, але переводит ся роботы основны. В першой мірі регулюе ся Вислу и робит ся запору на Дунайци, а пак аж прийде черга на другы мелиорацийны роботы.

Долше задержал ся Г-н Воевода на обговореню справы перенаселеня села. Представил розультаты дотеперешной акции (переселене, дополнене карликовых господарств и перемена их на господарства полны) и высказал потребу дальшой доцільной и постоянной роботы в том напрямі. Г-н Воевода подчеркнув с признательностью діятельность Безпроцентной Касы, котра може дати населеню огромны користи. С кредыту тых кас може користати аж и найбіднійший, лем бодай был он уцтывым и давал гваранцию, же гроши с кредыту оберне на добре діло.

Переходячи до справы будовы школ, заявил Г-н Воевода, справа тота ест перворядной вагы и же он поробил уж стараня, штобы власти пришли с помочом при будові.

Наконец Г-н Воевода, по обговореню других справ, заявил, же буде ся и в будучности интересовати справами повіту и навязуючи контакт с населенем, буде все слідити за розвитем экономичного жита повіту.

Предсідатель О. Т. Р. в горячих словах подяковал Г-ну Воеводи за всесторонны выяснения, и закончил свою промову многолітствием.

Не марнуйме отпадко.

В каждом, хоц бы наименьшом господарстві марнуе ся масу нибо то нич невартающих річей. Вышмарят ся на смітники дыравы бляшаны горнята и миски, поурываны обручи, ріжны шматы и таке инше. Здае ся нам, же то сут річи неужиточны и нич невартуючи, а тым часом до Польши спроваджат ся с чужих краев великы партии шмат и старого желіза.

В р. 1936 за спровадженя до краю шматы заплачено 23 милионы злотых, а за спроваджене старе и поламане желізо 37 миллионов злотых, а в році 1937 ище больше, бо за шматы и желізо — 100 миллионов злотых. Ест то сума барз поважна и не можна собі ей легковажити. Здала собі с того справу Німеччина и тамтешне правительство зарядило зберати всі отпадки. Зберают там отже бляшаны пуделка от пасты, фляшки, зломене желізо, шматы, кости и т. д. Зберают все, што у нас вышмарят ся на смітник и тоты отпадки дают в державном бюджеті поважны сумы доходу.

У нас мусит ся также звернути увагу на отпадки, котры повинни зберати передовсем женщины. Женщины, котры ведут домашне господарство, повинни мати с тых шмат, костей и инших отпадко невеличкы доходы. Скупом отпадко повинни заняты ся купцы, особенно на селі, бо на селі ест наибольше шмат и поломленого желіза. За отпадки склепары платят або грошами, або товарами. Отпадки такы сортуют склепары и продают централям, які повинни находити ся по всіх больших містах. Сорганізоване скупу отпадко може дати незлы доходы бідному населеню и сильно увеличити актыва державного бюджету. Прото тыж в интересі населеня и державы ест сорганізовати як найскорше централі скупу отпадко. Коли тоту буде зроблене и коли населене увидит, же и за стару шмату и поломлену подкову можна ище стоси достати, напевно займе ся оно зберанем тых отпадко и причинити ся до экономичного подносеня краю.

ЯКЫ ЛІКЫ ДЛЯ ЗВІРЯТ ТРЕБА МАТИ В ХАТІ:

При укушеню живины через скаженого пса.

Позволити стечи с раны як наибольше кырви. Пак, коли кров перестане течи, смаровати што хвилю сильно йодином або чистым спиртом. Найдальше до 4-ох дней спровадити ветерынара, штобы зацепил скотину против скаженны, бо то ест одыноке средство.

На хробакы у коня.

Ложку еметыку роспустити в половині литра теплой воды, вляти тоту до двох литров звычайной воды и дати коневу выпити. По тыждні повторити так само ще раз.

Як скотина задавит ся.

Коли скотина задавит ся компером, бураком, або карпельом, вляти до паши $\frac{1}{4}$ л. олію и пак старати ся вытиснути бульбу, чи дашто инше

назад до пыска. Если тоту не даст ся зробити, то вихати грулю до жолубка противным концем (без дрота) сонды).

Як успокоити корову.

Часом корова не хоче дати доити ся. Може так быти прото, што она мае на вымени, або на дойках раны або пырщыкы. Вотчас треба ю лічити. Але часом корова не хоче стояти спокойно без причины. Вотчас не поможе крик, ани битка. В тых разях одынокым средством ест положить на плечи, ближе шии, намоченый в зимной воді мішок. Корова успокоит ся сейчас и даст ся доити.

—oOo—

До ратованя живины треба мати в хаті:

- 1) Гегар до полоканя отходовой кышкы, похвы и матицы.
- 2) Сонду до ратованя при здутю.
- 3) Трокар до пробитя живины при здутю (як ніт сонца).
- 4) Иглу до пуцаня кырви.
- 5) Вату, газу, бандаж, або чисте полотно до ран.

Што чути в світі и в краю

Страшна зараза худобы в Англії. В Англії росширила ся застрашаючо слинавка, котра має барз острый перебіг. До тепер занотовано, же на слинавку захворило 2 и 1/2 милиона штук худобы. Власти выдали острый зарядження, штобы не допустити до дальшого росширяня ся заразы. Замкнено всі торгы в Англії, а также не вольно переганяти, ани перевозити худобы с одной місцевости до другой.

Литва будує желізну дорогу до Польщі. По угоді литовско - польской Литва приступила до отбудовы дороги и жел. тору вєдучої ку границі польской. Коло дороги поставлено уж телеграфичны столбы. Направляють понищены мосты и допроваджают до порядку дорогу и желізний тор.

Япония протестує против совітской помощи в Кытаю. Амбасадор японский в Москві выразил на руки Литвинова протест с причины уділення через Совіты помочи кытайским войскам. Литвинов протест тот отшмарил, яко неоснований и заявил, же Совіты не сут звязаны с Японієм нияким договором, котрый заборонял бы им продавати кытайцам военны материялы. В кытайской армии, сказал Литвинов, служат охотники с рижных краев, не лем с России и того не выкликало со стороны Японии протестов.

Франция выселила 450 вариятов до Польщі. До Гдыні приіхал не бодай який транспорт. Прибул до берегов корабель французский, на котром находить ся 450 вариятов, граждан польских. Хворы будут розміщены по рижных краевых шпиталях.

Министри шварцвали золото. В Букарешті, в Румунії, выкрыто аферу безправного вывозу золота за границу. В аферу сут замішаны два б. министри и много людей с финансовых кругов. До тепер стверджено, же за границу вывезено золота вартости понад 100 милионов лей.

В звязи с том афером арештовано Александра Буздугана б. посла румунского в Риіо-де-Жанейро. Буздуган пополнил самоубийство и оставил лист, в котром твердит, же ест невинный. Убийство Буздугана выкликало в Букарешті велике вражене.

Авантуры в парламенті французском. В парламенті французском пришло до авантур. Опозиция сильно атаковала премера Блюма, котрый домагат ся новых кредитов, выносячих 1 миллиард франков тыжднево. Против нему выступат оппозиция в Сенаті и ест возможно, же Блюм уступит.

Страшна вітерница в Польщі. Страшны вітры, яки через пару дней дули над Польщом, вырядили значны шкоды. Шкоды тоты сут найбільши в воеводстві станиславском.

В самом Станиславові вітер сорвал с одного дому дах, котрый, падаючи на дорогу убил Василя Перегинца и поранил свящ. дра Ягляржа, катехета державной гимназий в Станиславові; а также фиякра Корна.

Свящ. др. Яглярж лежить в шпиталі и стан его здравя ест безнадійный.

В другом місці вітер перевернув паркан, котрый упал на 6-літнього Ярослава Павликовского. Дітина была так потолчена, же умерла в шпиталі.

В Чорткові вітер вырвал с коренями дерево, котре упало на двоповерхный дом и частично его ушкодило.

„Армия с лопатами“ рушила до работы. С настанем весны покликано знова до работы всіх тых, котры не служили при войску и сут обовязаны до полнения заступчої войсковой службы. Работа покликаных тырват 6 дней.

В том році до заступчої войсковой службы будут покликаны всі тоты, котры достали категорию „Ц“ и родили ся в літах: 1912, 1913, 1914, 1915 и 1916 а также тоты с рочника 1911, котрым в минулом році роботу отложено.

Совітскы самолеты на фронті кытайско-японском. Коло Ганкау продолжают ся завзяты бои, котры приносят незначны побіды войскам кытайским. На фронті том появили ся великы совітскы самолеты гиганты, котры называют „Дума Совітов“. Сут то небывалой величины самолеты военны.

Горгонова просит даровати ей рещту кары. В грудні т. р. мине 7 літ от часу, коли Горгонову засудил суд на 8 літ вязницы. Адвокат Горгоновой звернул ся тепер до министра Грабовского с просьбом даровати ей рещту кары.

Вітер вывернул поїзд. Над Снятыном перешол так сильный вітер, же сопхал с шин цілый поїзд зложеный с 20 вагонов. Вагоны ушкодили ся.

Недалеко Любєня вітер вырвал с коренями цілый березовый лісєк, зложеный со 100 дерев.

Безпорядкы в Палестыні. Безпорядкы в Палестыні не устают. За 3 дни начислено аж 39. случаев нападу со стороны арабов. Высаджено в повітре 2 мосты, убито 30 подорожуючих и доконано численних подпалень и нападков на желізны торы. В многих місцевостях перерізано телефоничны проводы.

Оборона на случай газовой войны. Державы вынаходят труючи газы, штобы вытрити нима неприятеля, а также придумуют ріжны способы обороны перед тыма газами. В той ціли заосмотрют ся в противгазовы маски и будуют под земльом цілы дома, накрыты сильными жельбетонными плитами, в котрых в случаях газовых нападков має крыти ся цивильне населене. Во Франции на тоту ціль перезначено суму 435 милионов франков. С той величезной сумы мают ужити 235 милионов франков на будову подземельных домов охоронных, а 200 милионов франков на приготовлене протигазов.

ПОЧТОВИЙ ЯЩИК.

Г-н. Иван Муль Чарна — пов. Устрикы Дол. Банк Рольный дає пожичкы на сплаты родинны лем тым селянам, котрых господарство складат ся не с больше, як с 15-ох гектаров ґрунту, Пожичкы тоты може достати господар втотчас, коли сплчат с ґрунту діти, або сестры и братов, штобы ґрунту не ділити. Мусит он быти ипотечным властителем ґрунту и ґрунт мусит быти чистый от долгов ипотечных.

Пожичка не може быти меньша як 1000 злотых. Стараючи ся о пожичку пишут до Банку Рольного (отділ в Кракові) о прислане им друку на зятягнення пожички на сплаты родинны. Друк (формуляр) такый выполняють, дают потвердити его через уряд гминный и отсылают до Банку Рольного. Банк поучат, што треба дальше зробити.

Фонды перезначены на того рода пожичкы сут однак не великы и кто знає, чи не сут уж на тот рок вычерпаны.

В каждом разі радимо написати до Рольного Банку (Państwowy Bank Rolny (Oddział Kraków) то вам пришлют точны информации.

Продам фотографичный апарат

и научу скоро фотографовати.

Писати: Андрей Галушак

Прислоп

почта Усте Руске.

Куплю

„РУСКЕ ПАЛОМНИЧЕСТВО“

составлене Алексієм Булка со Скварявы выдане в Коломбы в р. 1906.

Писати до Админ. „ЛЕМКА“, Крыница 2.

Испытованный дяк и диригент

церковного и світского хору, добрый тенор

прииме посаду от зараз.

Зголошеня приимат Редакция „Лемка“ — Крыница 2.

Продам книжку

„ПАЛОМНИЦТВО ДО СВЯТОЙ ЗЕМЛІ“

Галушак Андрей

Прислоп

п. Усте Руске, пов. Горлицы

Комунальна Каса Ощадности Повіта Краковского в Кракові

Рок основаня 1882.

ЦЕНТРАЛЯ КРАКОВ, УЛ. ПИЯРСКА 1.

тел. 115-97, 131-73, 101-03.

О т д і л е н я : К Р Ы Н И Ц А, тел. 112.

В Е Л И Ч К А, тел. 6.

Всі порученя входячи в область банковости.

ПОРУЧЕНЯ ДЕВИЗОВЫ

ПОРУЧЕНЯ БИРЖОВЫ

СХОВОК АВТОМАТ.

СУМА ВКЛАДОВ ПОНАД 35.000.000 ЗЛ.

МАЄТОК ВЛАСНЫИ ОКОЛО 6.000.000 ЗЛ.

БЕЗОПАСНОСТЬ.

ДОБРЫИ ПРОЦЕНТ.